

欽定大清會典事例

欽定大清會典事例卷六百十七

兵部

綠營處分例

休致
離任

給假
隨任

越職

赴任

休致。順治年間定。武職老病乞休。二品以上。具疏自陳。三品以下。在京由都統奏請。在外由將軍等具題。交部覈覆。乾隆元年奉

旨。定例舉劾官員送部引見者。恐有被叅屈抑情由。是以令其赴部。如年老官員原係衰邁之員。亦難於假捏。若仍令赴部。徒勞往返。嗣後俱不必送部引見。其有情願赴部者。仍令該督撫給咨送部引見。著通行

各該督撫提鎮知之。○二年奏准。老病乞休各官。曾出征臨陣受傷。得有功牌者。請

旨令其原品休致。給以全俸。以養餘年。其出征並未禦敵。及無功牌者。請

旨令其原品休致。給以半俸。○二十四年奏准。內外三品以下官員。有年至六十以上。因老病告休。曾經出征打仗受傷。及得有功牌者。請

旨令其原品休致。給予全俸。其出征並未打仗。及無功牌者。請

旨令其原品休致。給予半俸。○又奏准。內外三品以

下官員有年至五十以上。病廢告休。曾經出征打仗。得有功牌者。准其休致。將可否賞給半俸之處。具奏請

旨。雖經出征。並未打仗。及無功牌者。准其休致。毋庸議給俸祿。○又奏准。內外三品以下官員。有年至四十以上。患病告休。雖出征打仗。得有功牌。亦准其休致。毋庸議給俸祿。○又奏准。內外三品以下官員。出有戍兵次數。老病告休。俱照例准其原品休致。毋庸題請給予俸祿。○二十五年奏准。提鎮老病請休。有總督省分。總督驗明

具題。無總督省分。巡撫驗明具題。副將以下。營衛守備以上。老病請休者。該將軍督撫題請休致。衛所千總。咨請休致。三十一年奏准。內外六品以下。呈請休致官員。該處大臣毋庸具奏。將該員軍功造冊送部。應否給予俸祿。由部查覈具題。三十五年奏准。內外三品以下官員。有老病不肯告休。隨時糾叅者。毋論年歲。曾否出征打仗。俱勒令休致。不得題請給予俸祿。○

四十九年

諭。向來武職旗員。年至六十以上。因老病告休。曾經出

兵打仗受傷者。皆加恩給予全俸。其綠營並無此例。惟念綠營人員。既能效力行間。打仗受傷。為國家出力。後因老病告休。不能與旗員一體邀恩食俸。未免向隅。朕於滿漢官員。從無歧視。嗣後綠營告休人員。除未經受傷者。仍照向例辦理外。其年屆六十以上。因老病乞休。曾經打仗受傷者。俱著照旗員之例。一體給予全俸。著為令。欽此。遵

旨議定。副將以下。守備以上。老病乞休官員。曾經出征打仗受傷者。年至六十以上。請

旨令其原品休致。給以全俸。五十以上。請

旨令具原品休致。給以半俸。若非自請告休。經該管上司勒令休致者。不准給俸。○五十五年

諭。鄂輝等奏。阜和協副將郎措升歷俸期滿。兵部調取引見。飭令來省考驗。該副將精力漸衰。騎射輒弱。請將郎措升勒令休致等語。郎措升年已衰邁。難勝副將之任。李世傑患病。精神不能周到。鄂輝等早應據實奏請勒休。以重營伍。乃竟任其戀棧。直屈該員俸滿。經部調取之期。恐引見時為朕看出。始為此奏。殊屬非是。孫士毅甫經到任。會銜具奏。尚可免其交部。鄂輝觀成俱著交部察議。嗣後文武官員年力就衰。

者。如係呈請告休。或將軍督撫提督等察看不能勝任。即行奏請勒休。方准以原品休致。如有似此俸滿推升。經部調取。恐來京時看出衰老情形。始行具奏者。除將軍督撫等交部議處外。即將該員降頂戴二級休致。所有副將郎指升。即照此辦理。○五十九年奏准。內外三品以下老病告休旗員。曾經出征打仗。或殺賊。或捉生。或受傷。有一二項功績者。年至六十以上。請

旨令其原品休致。給以全俸。五十以上。請

旨令其原品休致。給以半俸。其出征打仗而未經殺

賊捉生受傷。及出征未經打仗。而得有功牌者。年至六十以上。請

旨令其原品休致。給以半俸。五十以上。請

旨令其原品休致。給以半俸之半。○嘉慶四年奏准。告休人員。遇有殺賊捉生受傷各項功績俱全者。年至五十以上。請

旨令其原品休致。給以全俸。若僅止出征二三次。並未打仗。亦未得有功牌者。雖年在六十以上。亦止准其原品休致。毋庸給予俸祿。○六年奏准。東三省食半俸旗員。因老病告休。例應請給全

俸者。准給予原食半俸。應給半俸者。給予原食半俸之半。應給半俸之半者。於原食半俸之半。再減一等。係無俸之員。雖經出征打仗。止准以原品休致。毋庸給予俸祿。○又奏准。把總以上官員。因老病乞休。該督撫提鎮查驗屬實報部。准其原品休致。若非自行呈請。係該管上司揭報者。俱勒令休致。至外委究非職官。如有老病。經該上司揭報者。即行革退。若係呈請辭退者。俱准其辭退。毋庸議革。○又奏准。衛千總年力就衰。令該督隨時咨部勒休。其年至六十歲尚

堪供職者。展至六十三歲。再行甄別。如仍堪留任。給咨送部引。

見。可否留任。恭候。

欽定。若將年已就衰之員。濫行保留送部。將該督嚴加議處。留任之後。如有精力已衰。立即勒休。儻因業經留任姑容。照徇隱迴護例。議處。年至六十六歲以上。實有精力強健。辦事熟練者。仍准保留。均於咨內聲明。送部引。

見。恭候。

欽定。○八年

諭。向來軍政之年。不准告病。原以杜武員規避之漸。其奉旨查閱營伍年分。事關考覈。即與軍政無異。該營員如果自揣老病。何不及早呈明。必待臨時始行具報。其戀棧規避。情節顯然。若不明定章程。無以整肅戎政。嗣後各省凡遇奉旨查閱營伍之年。均著照舉行軍政之例。不准告病乞休。違者照例叅辦。著為令。

○九年奉

旨。兵部議奏。特清額甄別年老技庸之副將等員。請照例勒休一摺。內有副將舒隆阿曾出師三次。受傷七處。此等打仗受傷人員。其自請告休者。向例給予半

俸。今舒隆阿係勒休之員。是以兵部聲明毋庸議給。但念其屢次隨征。受有多傷。著加恩仍給半俸。以養餘年。此後勒休武職人員。其有出征受傷在三處以上。又無貪私劣迹者。無論年歲。俱給予半俸。著纂入則例。用示朕眷念戎行恩施格外至意。欽此。遵

旨議定。副將以下守備以上官員。因老病告休。准其原品休致。其曾經出征打仗受傷者。無論有無殺賊捉生。年至六十以上。以可否賞給全俸請旨。五十以上。以可否賞給半俸請

旨。如出征打仗殺賊捉生受傷各項功績俱全者。年

至五十以上。以可否賞給全俸請

旨。若非自請告休。經該管上司勒令休致者。不准給俸。如該員打仗受傷在三處以上者。無論年歲及告休勒休。均以可否賞給半俸請

旨。其受傷不及三處。並因貪私劣迹糾叅者。仍毋庸給予俸祿。至千把外委曾經出師打仗受傷。續經辭退告休。年在五十以上者。給予步糧一分。如該弁曾經出征打仗。因傷病舉發。或年老力衰。以致弓馬生疏。不能差操。經督撫咨革勒休者。給予守糧一分。如該弁打仗受傷。有在三處

以上。毋庸論其年歲。係辭退告休者。給予步糧一分。若因弓馬生疏。咨革勒休者。給予守糧一分。其休革各弁。如有產業可倚。及有子嗣在營食糧。及因貪私劣迹。斥革者。均毋庸給予。○十二年奏准。凡休致官員。如有前任事發到部。照例議處註冊。若所犯事件。例應降調者。仍按級降去頂戴。例應革職者。即革去職銜。其原品休致官員。原任內如有應行議敘案件。仍照例議敘註冊。遇有續議處分。仍按其公私分別抵銷。○又奏准。武職官員俸滿推升。經部調取引。

見後。該督撫提鎮始以衰老題請休致者。將該員降頂戴二級休致。其不能先事察看之該提鎮。降一級留任。督撫交吏部議處。○又奏准。外委究非職官。如有年老患病。經該管上司查出揭報者。即行革退。按照千把總一律辦理。若非自行呈請。即勒令休致。以歸畫一。○又議准。武職各官五品以上。告病勒休開缺。及二品以上。降革留任開復。並降調革職告病告休勒休。向係專案題覆。以題覆奉

旨之日開缺。參將以下告休者。以揭帖到部之日先

行開缺。入於半月彙題。○又奏定。各省武職。如遇查閱營伍之年。告病乞休者。即勒令休致。若告病乞休。係在

欽差大臣查閱之後者。仍准其告病乞休。○道光九年奏准。內外老病休致。及勒休官員。除前任內犯貪劣營私等項款迹。仍行覈辦外。若所犯事件。例應降調者。仍按級降去頂戴。例應革職者。仍革去職銜。至應議降俸。住俸。降職。罰俸。及降革。留任等項。俱免其查議。其休致勒休。例應食俸之員。除犯貪私劣迹。不准請俸外。若前任有

應降調處分。即按所降之級食俸。應行革職者。即不准食俸。該休員等原任內加級紀錄。及應行議敘案件。仍照例議敘註冊。遇有續議降調處分。仍按其公私分別抵銷。○同治元年

諭。劉慶奏請將因病乞休曾經打仗受傷人員飭部查明擢用等語。前因軍務未竣。將才需人。降旨令各路統兵大臣。及各該督撫留心諮訪。據實保奏。疊經中外大吏遵保錄用。茲據該御史奏稱從前因病乞休人員。其有曾經打仗受傷者。尚不乏人。該員等或忠勇性成。或熟諳韜略。若令坐廢終身。不無可惜。所奏

不為無見。著兵部於滿漢二品武職以下。因病乞休人員內。查明曾經打仗受傷者。迅即行文各該旗籍察看。該員等如已病痊。年力尚堪起用。即由各該旗籍給咨赴部帶領引見。以備錄用。

給假。○乾隆二十七年覆准。武職告假回籍之員。假期已滿。委係患病。一時難痊。該督撫驗明具題開缺。如年力未衰。俟病痊後照例辦理。○三十七年奏准。武職官員在部呈請給假。無論是否順道。係回籍省親祭掃者。給假二十日。修墓遷葬者。給假一月。並准其一體扣算程途。如

於假限程限之外。尚有遲逾。仍照赴任違限。按其逾限月日議處。仍按月彙題一次。○四十九年奏准。漢侍衛告假。如有逾限。至年滿應升時。按其所逾日期。另行扣足。方准升用。○嘉慶六年奏准。漢侍衛告假回籍。如遇親喪。准其在籍守制一百日。該督撫聲明咨部。假滿回京時。准其扣除。該省督撫不行詳明報部者。罰俸六月。該員不自行呈明督撫報部者。罰俸一年。如於四月限期已滿。遇有患病不能起程。呈明地方官具結。申詳督撫。先行咨報兵部。病痊之日。嚴

催依限起程。於咨內聲明。回京時准其扣除。如有冒混等弊。照捏詞蒙混例。降一級調用。○又奏准。漢侍衛等官。甫經授職。未逾一年。不准呈請省親修墓。乞假回籍。一年之後。如有省親等事。取具同鄉京官印結。呈明該管大臣具奏。奉旨准其回籍者。赴兵部親領定限執照。其往返程途。在京者限十五日。直隸限兩月。山東河南山西限三月。陝西甘肅浙江江蘇安徽湖南湖北江西限四月。福建廣東廣西四川貴州限五月。雲南限六月。除往返日期外。在家准住四月。依限

回京。即將原領執照在部呈繳。如有逾限者。至年滿應升時。逾限不及一月。按所逾日期。另行扣足。方准升用。逾限一月以上。停升三月。逾限二月以上。停升六月。逾限三月以上。停升九月。逾限四月以上。停升一年。逾限八月以上。停升二年。逾限一年以上。停升三年。逾限二年以上。休致。○又奏准。旗員補放綠營。如有子弟告假省親。在本旗具呈給假。赴部請給路引。前往任所者。限滿之日。地方武職。不即催令起程。無故在任所逗遛。經管旗大臣叅奏。將本人解京治

罪。其父兄容留不行。催令回旗。逾限半年以上。罰俸一年。一年以上。降一級留任。二年以上。降一級調用。至並未請領路引。赴任所不行。呈明解京者。一經查出。無論久暫。將伊父兄俱降三級調用。○十二年議准。武職承緝督緝案件。如於限內丁憂。告假回籍治喪者。均准扣除告假日期。俟假滿回營之日。前後接算。扣限查叅。○十七年

諭。嗣後王公及滿漢文武大臣官員等。遇有妻喪。除遵照定例期年之內。不與朝會祭祀外。其初喪時。應如

何分別等級。給予假限。及如何報明陳奏之處。著交軍機大臣會同宗人府禮部詳議具奏。○同治元年諭。曾國藩奏帶兵大員聞訃丁憂。可否循例毋庸開缺等語。浙江提督鮑超。現在聞訃丁憂。呈請給假奔喪。惟甯國一帶。現值勦防喫緊之時。該提督係帶兵大員。勇敢善戰。久為各軍倚重。更不可輕離防所。鮑超著照例毋庸開缺。改為署理。即著在軍營穿孝二十七日。俟江南軍務大定。再由該大臣奏請給假回籍營葬。以遂孝思。○六年

諭。左宗棠奏記名提督劉厚基因母病請假省視等語。

目前陝西軍務喫緊。劉厚基樸勇著名。現值攻勦甘泉安塞等處賊巢。正屬得手。未可遽令離營。劉厚基著毋庸給假。加恩賞給伊母人蔘四兩。由左宗棠發交該提督祇領。以示體恤。○十年

諭。李瀚章奏提督郭松林因母病請假歸省等語。提督係專閫大員。湖北地方操防尤關緊要。郭松林因母病請假。原無不可。惟應奏明請旨。或由督臣奏請。俟經予假期後。方准起程。乃該提督不俟諭旨。輒即回籍。實屬非是。郭松林著交部議處。仍賞假一箇月。假期滿後。迅即回任。毋許耽延。李瀚章於郭松林請假。未

經請旨奏定假期。先准回籍。亦屬不合。李瀚章著一併交部議處。

越職。○康熙二十三年議准。武職擅受民詞者。降一級調用。○乾隆四十八年奏准。營員擅受民詞。該管上司失察。罰俸一年。○嘉慶六年奏准。武職擅受民詞。不移送有司。擅行批斷者。降三級調用。失察之該管上司。降一級留任。若上司自行查出。揭叅者。免議。○十二年議定。營汛武弁。拏獲盜賊。並不移送有司審理。擅自責打致死。比照擅責平民致死例。減等議以革職兼

統各官降一級留任。○道光二十四年

諭署河莊營千總世襲雲騎尉郭兆魁。身為武弁。輒敢擅受民詞。致釀人命。實屬膽大妄為。玩法已極。著從重發往新疆效力贖罪。太原營參將得陞靖安營都司岳陞。於屬員擅受釀命。毫無覺察。實屬形同木偶。著交部嚴加議處。太原鎮總兵關亮。濫委釀命。暫行毋庸交部議處。著即送部引見。梁萼涵兼管提督。未能先事查察。著交部一併議處。○同治二年

諭據曾國藩奏代陳李世忠因勝保逮京治罪。懇請褫職立功贖罪一摺。將帥為國家大臣。貽誤軍務。罪有

攸歸。刑章憲典。稟之

列祖

列宗。非朝廷所得而私。勝保以督師大員。種種貽誤。疊經中外叅劾。猶恐被人誣毀。復密派大臣。確切訪查。始行逮京治罪。此豈臣下所得代為乞恩。曾國藩據李世忠之稟。率行具奏。揆諸體制。殊有未協。現在江南逆匪紛紛渡江。李世忠受恩優渥。官居專閫。自當迅速立功。以圖報稱。即前此該提督勝保拊循保全。亦由仰承

文宗顯皇帝如天之度。准其投誠。得以邀此異數。該提

督自應力矢公忠。不得專顧私誼。如此瀆請。姑念李世忠本係武夫。不深責備。所有李世忠自請褫職之處。加恩改為革職留任。曾國藩即轉飭該提督迅將九洑洲等處賊匪。奮力擊勦。不使該逆旁竄。辦理確有成效。由該大臣奏聞。聽候諭旨。勝保功罪。朝廷自有權衡。固毋庸臣下喋喋為也。

赴任。○雍正八年議准。八旗外任武職各官。於到任三月內。將所帶家人姓名籍貫。冊報督撫提鎮。如管事家人有更換者。亦隨時冊報。儻本官有虧空等弊。將管事家人一併審究。若冊報

不實。或聽其贖身為民。將該員照隱匿逃人例議處。不詳查之該管上司。照失察逃人例議處。得財者並計贓以枉法從重論。○嘉慶六年奏准。旗員身任綠營。如接任官不將起程日期申報者。罰俸六月。如不將該故員眷口查明造具冊結呈報。或不代為請咨依限歸旗者。將接任官罰俸一年。○又奏准。接任官將前任旗員家口聽其隱匿。不行造報者。降一級留任。不行查叅之兼統各官。罰俸一年。督撫提鎮俱罰俸六月。○七年

諭嗣後滿漢文武大員簡放之後。雖不必定以限期。亦須兩三日即行請訓。請訓後總當迅速起程赴任。毋得藉詞濡滯。致曠職守。○十八年

諭先福奏請留升任守備以資差緝一摺。江西撫州營千總蘇兆熊。前因節次緝獲匪犯。加恩以守備用。茲既選升廣東韶州鎮右營守備。即應令其領劄前赴新任。乃先福違例奏請。將蘇兆熊留於江西省題補。摺內稱近年匪徒斂迹。比戶輯寧。實屬緝捕著有成效等語。竟似蘇兆熊一人將江省盜賊緝獲淨盡者。任情誇美。不自知其言之失實。况部選將備各有定

例。若外省請留之例一開。紛紛援照。殊於銓法有礙。所奏不准行。○咸豐四年

諭。羅繞典等奏防堵緊要。仍請暫留署任總兵等語。升授廣西左江鎮總兵。色克精阿。前因接替無人。暫准留署鎮遠鎮篆務。茲新任鎮遠鎮總兵金剛保業已到黔。應即交卸。況現在廣西伏莽未清。土匪不時出沒。該省又無實缺總兵。正在需員督勦。著羅繞典將鎮遠即飭色克精阿速赴廣西新任。毋許再留黔省。鎮遠下游一帶。即飭金剛保嚴為防範。該總兵於貴州情形尚未熟悉。並著隨時察看。如其人地不宜。即

著該督等酌量揀員調署。總期營務邊防實有裨益。是為至要。○同治四年

諭。劉長佑奏請飭催實缺鎮將赴任。並請酌調軍營凱撤武職大員委用一摺。據稱直隸現在武職多係揀發人員。於練兵設防諸事殊少諳習。直隸實缺鎮將多在各路軍營。請催速回本任。如該員實係帶兵防剿喫緊。未能即時赴任。可否將湖廣等省現撤諸軍內酌發鎮將數員來直差委等語。直隸為畿輔重地。選兵練將最為切要之圖。况現當豫省賊氛未靖。與直境毗連。尤須豫籌防堵。直隸鎮協各員求其謀勇

兼優。緩急可恃者。實屬寥寥。營務安能大有起色。除
婁雲慶宋國永等。將來尚須隨同鮑超出關勦賊。及
統帶兵勇接替乏員者。均未能即時赴任。毋庸飭赴
本任外。其餘實缺鎮將各員。均著各該督撫催令赴
任。以重職守。現在湖廣江南江西江蘇等省。均有遣
撤隊伍。其中均不乏得力鎮將。投閒置散。既屬可惜。
若派令來直整飭營務。實為有益。著官文曾國藩李
鴻章沈葆楨各於現撤諸軍內。擇其膽識過人。戰功
卓著之鎮將。保奏數員。發往直隸。交劉長佑差委。並
著劉長佑隨時考察。如該員等真能出力。准由該督

隨時請旨補用。

離任。○順治年間定。老病休致武職各官。任內有承督未完之案。令接任官完結者。本官已經休致免議。若有侵挪貪酷營私等弊。仍照例處分。○康熙二十九年奏准。八旗外任武職各官。因降革休致事故歸旗。任內並無未清之事者。離任之後。該督撫提鎮即令接任官。將該員家口查明造冊。出具並無遺漏隱匿印結。一併咨報部旗。於五月內催令起程。照程途遠近定限。有驛大路日行一站。無驛僻路日行五十里。接

日計算。扣定到京日期。其有水路省分。願由水路行者。豫先呈報。仍照原定限期計算。到京均咨報部。旗查覈。如無故不即行起程。逾限一月以上。或中途逗遛。或潛居別處。或本身進京。而家口仍住別處。有職者革職。交刑部治罪。已革職者。交刑部從重治罪。若於原任地方起程。逾限不及一月。或實因患病。及有別項情由。不能起程。或中途實因患病。及有別項情由。不能前進者。取具地方官印結報部免議。至接任官將前任旗員家口。聽其隱匿。不造入冊內。並該員

已經起程。不將日期申報。或已經申報。而督撫提鎮不咨報部旗。以致逗遛生事。及中途妄借事端。勒取印結。地方官不據實申報。遽給予印結者。發覺。皆照例議處。○又奏准。外任武職例應歸旗者。專管官不速催起程。容留一人者。降一級留任。二人降一級調用。三人降二級調用。四人降三級調用。五人降四級調用。六人以上革職。兼轄官於所轄地方。容留一二人者。罰俸一年。三四人降一級留任。五人以上。降二級調用。十人以上。降四級調用。提鎮所轄地方。容留

一二人者。罰俸三月。三人罰俸六月。五人以上。罰俸一年。十人以上。降一級留任。○乾隆二十五年奏准。升任官員。有承辦未完錢糧盜案事件。經署任官揭報該督撫提鎮題參。將本官照離任官例。每案罰俸一年。○三十七年奏准。衛所官員將候選官初授官病故情由。不行轉報。或由部提審對質之官。不行報明。經部選給予劄票後。始行補報。或未報上司。諉稱已報上司者。將衛所官罰俸一年。其中報情由舛錯者。罰俸六月。上司免議。如衛所官員已報上司。上司

不行申報者。將不報之上司。罰俸一年。衛所官免議。如上司將已報情由不行承認。推諉屬員者。亦罰俸一年。如候補候選官病故。家屬未經具報者。衛所官免議。○嘉慶六年奏准。八旗外任武職。應行歸旗者。專管官不速催起程。容留一官。及伊家口在彼潛住。在三月以上。降一級留任。兼轄統轄官。罰俸一年。提督總兵。罰俸六月。半年以上。專管官降一級調用。兼轄統轄官降一級留任。提督總兵。罰俸一年。一年以上。專管官降二級調用。兼轄統轄官降一級調用。提

督總兵罰俸二年。○十二年議定。凡直省副將參將遊擊都司守備千總等官。接任交代時。將營中庫儲一切軍裝礮械救火器具。並城門堆撥墩汛等處。排列各項軍械。各就本管之處。查明交代。陝西甘肅二省。督撫提鎮標下中營。俱限四十日交代明白。雲南督標提標臨元等六鎮。以及貴州提標安義等四鎮。俱限五十日交代明白。其餘各標協營。並江蘇安徽江西山東直隸山西河南浙江福建四川湖南湖北廣東廣西等十四省。俱限一月內交代明白。離任官

員。取新任官查收清楚回文。方許起程。接任官員如已經交盤。並無缺少。造冊出結。聲明到任。交盤清楚各日期。通報總督巡撫提督總兵。專案造冊報部。如交盤之時。舊官推卸玩延。新官勒指隱捏。以及交代遲延。均照交代錢糧盜案。例分別議處。如軍械有缺額殘損者。照軍器缺額及修整器械例分別議處賠補。○又議定。旗員身任綠營。如有告病告休丁憂。及緣事降革回旗者。該督撫給予兵牌。若該員並未赴站報明。黏貼印花。以致沿途地方官無憑撥護者。將

不行赴站黏貼印花之員。罰俸六月。○十五年議定。旗員身任綠營。遇有事故回旗。並不呈明總督巡撫請給兵牌者。罰俸一年。

隨任。○雍正五年奏准。八旗外任武職各官。所有族人及十八歲以上之親子弟。皆不准帶往任所。如子弟有實不能相離者。由該都統將情由具奏。其未至十八歲子弟欲帶往任所者。呈明該佐領參領都統存案。准其帶往。至十八歲時。該旗行文該督撫提鎮勒限歸旗。儻私自帶往任所。及隱瞞年歲。將該員降一級調用。○乾

隆三年奉

旨。嗣後旗員請留子弟隨任者。該部務須查明實有不能相離情由。方可奏聞請旨。○四年奏准。八旗外任武職各官隨任子弟。因赴選應試等事來京。該父兄由任所造具本人履歷年貌清冊。呈報該管督撫提鎮移咨部旗。仍具文交本人親投該旗查對。若該父兄係提鎮大員。可自行出咨者。即自行出咨。其不候給咨私自來京。或領咨潛往他處。有職銜人革去職銜。聞散人鞭一百。如該父兄不為請咨給咨。擅令來京。罰俸一年。若

已將情由呈明。而該督撫提鎮不給咨者。罰俸九月。至有事來京。仍回原處者。呈明該旗移咨該督撫提鎮。仍具文給本人投該任所上司查對。如不候給咨私回。或領咨潛往他處者。該隨任子弟照前例議處。其各官內有緣事解任。應留任所者。如隨任子弟。有質問之處。由接任官申報該上司咨明部旗。仍留任所質問。若無可質問。其應先歸旗之隨任子弟。接任官不為請咨。私令歸旗者。降一級留任。隨任子弟不候給咨。私離該父兄任所。及潛往他處。該地方官未

經查出申報者。罰俸九月。其子弟亦照前例議處。○六年奏准。隨任子弟。至應歸旗之年。實有不能相離情由。欲留任所者。係提鎮子弟。該提鎮自行具奏。副將以下。督撫提鎮代為具奏。由部查明。實有不能相離情由。奏明准其隨任。儻父兄將子弟私留任所。及隱瞞年歲不送歸旗。將該員解任。令其親送子弟來京。仍降一級調用。○七年

諭。向來旗員子弟。自幼隨任在外。年至十八歲者。例應來京。若有欲留任所協辦家務者。准督撫代為題請。

聽候部議。其新授外任之人。子弟在家長養。年過十八歲以上者。非奉特旨。不得隨任。此舊例也。朕思旗員子弟。不許擅隨任所者。一則恐在地方滋事。一則留京以備該旗當差。如外任旗員。能嚴加約束。為督撫者。又不時稽察。則皆知守分循理。可無慮其多事。至該旗佐領。若本有可以當差之人。而父兄外任者。將子弟帶往。則本人既可省兩處之食用。該佐領閒散之人。又得當差。支領錢糧。以資養贍。洵為兩便之道。嗣後外任旗員子弟。年至十八歲以上者。在外仍令該督撫題請。在內著呈明該都統察奏。皆准其隨

任。其不願隨任者亦聽之。若隨任之後。或出署交游。及干預地方之事。著該督撫即行參奏。從重議處。○二十五。年。奏。准。外任旗員。武職自副將以上。駐防官自副都統以上。除止有一子者。准留任所外。其有二三子者。准留一子隨任。有四五子者。准酌留一二子隨任。餘子年至十八歲以上。盡送來京挑取拜唐阿。如有託故規避者。革職。○嘉慶六年。奏。准。官員隨任子弟。雖未營私滋弊。而聽其與人接見。出入無忌者。本官照例議處。失察該管上司。罰俸六月。○十二年。議。准。旗員

將子弟私自帶赴任所。及隱瞞歲數。不令回旗者。一經查出。將該員降一級調用。失察之該旗大臣。罰俸六月。○又議定。官員任聽隨任子弟借辦公事之名。與人接見。致有夤緣受賄滋弊等事。其父兄知情故縱者。革職。照例治罪。僅止失察者。降一級調用。該管上司知情徇隱不行揭叅者。降三級調用。僅止失察者。降一級留任。提督總兵俱罰俸一年。若子弟並無夤緣受賄滋弊情事。而聽其與人接見。出入無忌。以致犯法滋事者。如私酒賭博宿倡之類。將本官降一級調用。止

於失察者降一級留任。該管上司罰俸六月。○
道光九年奏准。旗員外任。如族親內有品行端
方。諳練公事。情願令其隨任。幫辦公務者。或有
篤睦家族親黨。帶往令其讀書肄業者。大員准
其咨報該本旗。餘則呈報上司。轉咨該本旗。查
取本人父兄情願令其隨任甘結。報部發給路
照前往。不願者聽。其非由本任職官呈請。而本
人願往者。一概不准。如有呈請尊長隨任者。由
該族長出具並無抑勒甘結。該佐領加結呈報
本旗。查覈屬實。准其隨任。該參佐領等如有故

意挑剔。藉端勒指刁難等情。從重懲辦。如有私行潛往者。照例治罪。至到署後。如有不服管束。輕者報明督撫等咨遣回旗。重者照例懲辦。仍令該管官嚴加查察。如有不安本分滋事之人。本員失察者。照失察例議處。徇庇者。照徇庇例議處。其由本員查出呈報者。免議。

欽定大清會典事例卷六百十八

兵部

綠營處分例 戶口 錢糧 承運

戶口。順治年閒定八旗外任武職各官。將任內所生之子。隱瞞不報。本旗入冊者。照旗人隱瞞壯丁例議處。○乾隆五年議准。八旗外任武職各官。若將任內所生之子。過繼與人。潛匿別處居住者。革職。該管上司罰俸一年。失察者。罰俸六月。如於半年內查出。揭報者免議。○五十年議准。旗員升任綠營武職。副將以上官員。止

留子弟一人。其參將以下等官。本員酌量詳請。俟升至副將。由該旗查明子弟及孫年已及歲者。留一人外。其餘年已及歲之子弟及孫。俱令回京。以備挑差。○嘉慶六年奏准。外任武職旗員子弟。應行回京挑差。儻有逗遛。其瞻徇不行查催者。罰俸一年。本員降一級調用。該旗都統副都統等。罰俸六月。○十二年議准。舊例武職由行伍出身。若不呈明籍貫。推升至守備都司。在原籍省分府分。始行呈明迴避者。查無因缺希圖改調之弊。將從前隱匿不行呈明之員。降

二級留任。比照吏部定例。推選官員。於過堂時。不行呈明迴避處分。分析辦理。如有未經呈明。經部推升至守備都司。在該員原籍省分府分。始行呈明迴避者。降一級留任。若並不呈明。別經發覺者。降一級調用。○又議准。向例副將以上官員。如休致緣事解退之後。不許在彼處入籍。其不能回籍者。該督撫亦不得代為奏請入籍。嗣後改照吏戶二部例。凡武職官員罷職之後。有因在任年久。原籍並無產業宗族。無可依歸。不得已而請入籍任所。或已經身故。其子孫

欲於任所入籍者。副將以上等官。該督撫奏明
請

旨。○二十一年

諭。向來各項引見人員內。有大員子弟皆不聲明。朕無
由知悉。逮簡用後。其父兄具摺謝恩。朕始知之。嗣後
無論京察軍政及京外各項引見人員內。凡滿漢文
武二品以上大員之子弟。俱著自行呈報。引見時於
綠頭籤內註明。如有漏報者。查出交部議處。○道光
元年

諭。刑部奏查訊抱養過繼官員一摺。貴州安義鎮總兵

達凌阿。本係民人。三歲時。經旗人額勒登抱養為子。現被伊族兄舒凌阿呈控。並據伊自行呈首。刑部援照舊案。請將達凌阿作為另戶。現在八旗查出抱養過繼支食錢糧之人。均奏明另檔存記。及身而止。達凌阿曾經兩次出兵受傷。得有功牌。若與另檔存記之人。一律辦理。未免無所區別。達凌阿著加恩撥入正藍旗漢軍。其子孫俱照漢軍例當差。伊留質之案已結。即赴貴州安義鎮之任。其呈報遲延之處。交部照例議處。○九年奏准。旗員補放綠營。如有子弟告假省親。係官員兵丁。照例赴部請給路引。前往

任所限滿之日。不即起程。無故在任所逗遛。經該管大臣叅奏。本人解京治罪。其父兄容留不行。催令回京。逾限半年以上。罰俸一年。一年以上。降一級留任。二年以上。降一級調用。至並未請領路引。私赴任所。不行呈明解京者。一經查出。無論時之久暫。將伊父兄俱降一級調用。若係閒散。照閒散告假之例辦理。○又奏准旗員補放綠營。其子弟年至十八歲以上。已有職官。欲請帶赴任所者。提督總兵自行具奏請

旨。副將以下官員。於該旗呈報。由該旗都統查明具

奏均准其隨帶。如未經奏請自行帶往者。本員降一級留任。失於查出之該管官。罰俸半年。若係兵丁。照兵丁告假之例辦理。係閒散。並十八歲以下者。俱照閒散出外之例辦理。俱毋庸具奏。其帶往任所後。子弟年至十八歲以上。欲請留任所者。亦照閒散在外有事逗遛之例辦理。毋庸具奏。至下五旗王公屬下之人。升任外任。其子弟現在王公門上當差。該旗詢明該管王公等。如無用伊之處。照兵丁告假之例辦理。若未在本王公門上當差。照閒散之例辦理。○同治

四年

諭八旗都統等會同戶部等部奏遵議沈桂芬條陳籌費移屯恤旗民而實邊防一招據稱旗人聽往各省之法道光年間曾經籌辦有案現擬量為推廣以裕旗人生計請嗣後旗人有願出外營生者無論降革休致文武官員及未食錢糧本食錢糧舉貢生監暨兵丁閒散人等准由該都統給照前往如願在外省落業准其呈明該州縣編為旗籍其服官外省之降革休致文武各員及病故人員之子孫親族人等無力回京者亦准一體辦理所有詞訟案件統歸該州

縣管理如有不安本分滋生事端者。即由該地方官照民人一律懲治。其願入民籍者。即編入該地方民籍。文武考試章程。俟應試有人。再由督撫體察情形。奏交該部覈議。至八旗兵丁人等在外落業者。並准其挑補綠營馬戰守兵各等語。所籌尚屬周妥。即著八旗都統將此次推廣辦法。逐節出示曉諭。俾衆咸知。以裕生計。而示體恤。

錢糧。○原定武職各官。將經手錢糧乾沒侵欺者。革職提問。照例勒追。如係兵丁字識侵欺者。照例治罪勒追。將該管官革職。○又定武職各

官將正雜錢糧擅自挪移別用者革職。若因緊急軍需未經報明督撫私自挪移應用者降一級留任。俟銷算清完之日開復。至存留公用錢糧因公挪用者免議。挪移米糧豆草亦照此例分別議處。○又定衛所田畝被災奉蠲錢糧衛所官或混徵侵蝕或不即通行曉諭希冀暗吞或捏稱有蠲有不蠲私圖自得一半。或將賑濟災戶銀米及所免錢糧借名肥己者皆革職提問。或將奉蠲錢糧增減造入冊內者降二級調用。或被災尚未題請蠲免於報冊內填入蠲免

者。罰俸一年。○又定。衛所官將經手錢糧蒙混
銷算者。降二級調用。應行完結錢糧。故留疑竇。
並不分析。混行造冊呈報。以致款項不符者。降
一級調用。冊內數目舛錯遺漏者。罰俸一年。若
將冊結遲延不送。經督撫題叅。違限不及一月
者。罰俸三月。違限一月者。罰俸六月。二月者。罰
俸九月。三月者。罰俸一年。四五月者。降一級留
任。六月以上者。降二級調用。一年以上者。革職。
至造尋常一應冊籍。不開繫錢糧者。若有舛錯
遺漏。罰俸三月。如有遲延。仍按月議處。○又定。

各省漕糧經徵衛所官。未完一分以上者。罰俸六月。未完二分以上。住俸。未完三分以上。降二級。未完四分以上。降三級。未完五六分以上。革職。皆戴罪徵收。完日開復。其叅後仍違限未完者。加倍議處。應降二級者住俸。應降四級者住俸。應降三級者降二級。

革職者仍戴罪徵收。完日開復。應降二級者即實降二級調用。

白糧考成亦照

此例。署印官照屯糧署印官例議處。○又定。隨漕輕齎等項。經徵衛所官。初叅未完不及一分。停升。罰俸一年。未完一分。降職一級。未完二分。降職二級。未完三分。降職三級。未完四分。降職

四級皆戴罪徵收。未完五分以上者革職。署印官照正印官例議處。不及一月者免議。以上經徵未完官。初叅之後。再限一月全完。限內若仍不完。不復作分數。即照原叅分數議處。不及一分者。降一級留任。再限一年全完。若仍不完。降一級調用。未完一分者。限內完至八九釐。降三級留任。再限一年全完。若仍不完。降三級調用。未完二分者。限內若仍不完。降四級調用。未完三分者。限內若仍不完。降五級調用。未完四分以上者。限內若仍不完。革職。○又定衛所官將

應行起解錢糧於奏銷以前如數全完。千兩以下者。紀錄一次。千兩以上。三千兩以下者。紀錄二次。三千兩以上者。紀錄三次。徵糧一石者。作銀一兩。計算考成。其署事官於奏銷前全完者。照此議敘。若止完地丁錢糧。而本色顏料並一應雜項未完者。不准議敘。○又定。衛所官經徵河銀一年全完三百兩以上者。紀錄一次。○又定。兵餉應照例覈實給發。若官弁扣剋或虛冒兵餉者。皆革職提問。不揭報之該管官。照不揭報劣員例。分別議處。若督撫提鎮於糾參疏內。

不將不揭報各官並叅者。罰俸一年。○順治十八年題准。經徵屯糧。初叅未完不及一分者。停升。未完一分。罰俸六月。未完二分。罰俸一年。未完三分。降俸一級。未完四分。降俸二級。未完五分。降職一級。未完六分。降職二級。未完七分。降職三級。未完八分。降職四級。皆戴罪徵收完日。開復。未完九分十分者。革職。署印官未完一分二分者。罰俸三月。未完三分四分者。罰俸六月。未完五分六分者。罰俸九月。未完七分八分者。罰俸一年。未完九分十分者。降一級調用。署印

官不及一月者免議。以上經徵未完官。初叅之後。再限一年全完。限內若仍不完。不復作分數。即照原叅分數議處。七分八分限內若仍不完。革職。五分六分限內若仍不完。降五級調用。三分四分限內若仍不完。降四級調用。二分以上。限內若仍不完。降三級調用。一分以上。限內完至八九釐者。降三級留任。再限一年全完。不完降三級調用。限滿未完不及一分者。停升。罰俸一年。○又題准。衛所官經徵鹽課未完不及一分者。停升。未完一分以上。降俸一級。未完二分

三分降職一級。未完四分五分降職三級。未完六分七分降職四級。皆戴罪徵收完日開復。未完八分以上者革職。署印官未完一分二分者罰俸三月。三分四分罰俸六月。五分六分罰俸九月。七分八分罰俸一年。九分十分降一級調用。署印官不及一月者免議。以上經徵未完官初叅之後再限一年全完。限內若仍不完不復作分數。即照原叅分數議處。不及一分者限內若仍不完降一級留任。再限一年全完不完降一級調用。一分二分限內若仍不完降三級調

用三分四分限內若仍不完降四級調用五分
六分限內若仍不完降五級調用七分以上者
限內若仍不完革職。又題准衛所官承銷鹽
引未完一分者停升未完二分降俸一級未完
三分降俸二級未完四分降職一級未完五分
降職二級未完六分降職三級未完七分降職
四級皆戴罪督銷未完八分以上者革職其戴
罪督銷官限一年銷完如限內不完照屯糧限
滿未完例議處至行鹽地方衛所官如有私勒
戶口買鹽銷引者革職不行查報之上司各降

三級調用。署印官銷引未完一分二分者。罰俸三月。未完三分四分。罰俸六月。未完五分六分。罰俸九月。未完七分八分。罰俸一年。未完九分十分。降一級調用。署印官不及一月者免議。○康熙九年題准。武職各官解送錢糧。沿途停閣日期者。罰俸一年。○十四年議准。衛所官有限滿未完錢糧。初叅四分。係

赦前二分。

赦後二分者。若限內將

赦前未完二分已經全完。照

赦後未完二分議處如限內

赦前二分未完仍合

赦前

赦後一併議處至初叅四分皆在

赦前限內未經全完仍照原叅分數以初叅例議處

如限滿未完錢糧限內又經過

赦者扣除

赦前月日以

赦後計算年限滿日查明題叅照例議處○又議准

衛所官經徵各項錢糧於未完之先別經降調

離任者。罰俸一年。○又議准。衛所官有未完雜
項錢糧。不作分數者。由部覈明題叅。降俸二級。
戴罪督催完日開復。限內不完。罰俸一年。仍令
督催。署印官有未完。不作分數。雜項錢糧者。罰
俸一年。○又議准。衛所官以未完錢糧捏作全
完申報。或限內經一二官徵完。捏作一官徵完
者。皆革職。如衛所官申報未完。該管上司以全
完轉報者。將申報上司降二級調用。衛所官免
議。至錢糧未經起解。申報起解。或庫內無銀。申
報有銀者。皆降二級調用。一應批迴。未獲稱為

已獲未發稱為已發者。皆罰俸一年。○三十四
年議准。凡有分數錢糧接徵衛所官。以到任之
日為始。限一年全完。如限內不完。將已完分數
扣除。照現在未完分數。以初叅例議處。○又議
准。徐淮臨德等倉。本色米及改折銀。限一年全
完。不完將衛所官照屯糧初叅例議處。如再不
完。照屯糧限滿不完例議處。○三十八年

諭。直省營制額兵。虛伍冒餉者甚多。甚干法紀。嗣後須
加省改。如有濫行冒支扣剋者。事發從重治罪。○又
議准。各營官弁給發兵餉之時。在省令布政使

司糧道在府州縣令各正印官將兵餉會同該官弁如數封固按名散給如有扣剋等弊照例議處○四十二年題准運到軍營米糧豆草經收武職各官延接不收及不收本色勒索折價者統兵將領查出題叅將經收官革職提問此等延挨勒索情弊經監放錢糧官據實申報統兵將領徇隱不題叅者亦革職提問若係失察將統兵將領等降四級調用經收武職之該管官革職至統兵將領等及武職大小各官販賣米糧豆草屬託地方官多取價值或將民間所

買米糧豆草。作為己物。屬託地方官。令其收買者。皆革職提問。如將此等情弊舉首者。係官以應升之缺先用。常人授為七品官。○又議准提督給隨糧八十名。總兵官隨糧六十名。副將隨糧三十名。參將隨糧二十名。遊擊隨糧十五名。都司隨糧十名。守備隨糧八名。千總隨糧五名。把總隨糧四名。均按名給予糧餉。此外有將使令家人混充兵額者。嚴叅議處。○雍正八年奉旨。提鎮以至千把總。已給親丁名糧。以資養贍。今各省增設外委千把。尚未議及其所辦者。千把總之事。而

所食者。仍止本身一分馬糧。一應費用。實有不敷。著將外委千把總。每人給予步糧一分。即令其子弟家人頂食。以資養贍。儻有仍藉辦公名色。扣剋兵餉。滋擾地方者。著該管官即行揭報指叅。○十一年議准。武職應得隨糧。各按本地營伍。將馬步守均勻配搭支食。若於額定隨糧之外。多占者。革職。該管上司不稽查揭報者。降三級調用。○十二年議准。火藥關係緊要。必須豫備。方為有益。督撫提鎮將所轄各營酌量。每年應用之數。動用公費製造。潮溼地方。豫備三年。高燥地方。豫備五

年加謹收存。每年所用火藥。即於收存數內動支。仍照動支數目。製造存庫。出陳易新。按年造冊報部。該管官如遇升遷。事故離任。照倉庫錢糧例交代。若有虧缺及不堪應用者。責令專管官賠補。仍罰俸一年。該管上司罰俸六月。○乾隆三年。議准。衛所官經徵蘆課未完。或初叅。或限滿題叅。皆照徐淮等倉錢糧不完之例議處。○又議准。衛所官凡有未完各項錢糧。經戶工二部覈明。續完蠲免。具題到部者。不俟題覆。即准銷案。如戶工二部疏內分數職名。與本部原

案不符。諮詢戶工二部銷案。如又有不符。仍行題明查辦。○六年奏准。軍營販賣米糧豆草。多取價值。及將民間所賣豆草。屬託地方官令其收買。舉首之常人。向例授為七品官。嗣後改為給予八品頂戴。○又議准。衛所經徵接徵各官。有未完錢糧。叅後續完。或

恩赦蠲免。應行開復本官。不呈請開復者。罰俸一年。○二十五年奏准。總兵到任盤查營中銀兩。須親臨庫存處所。不得提驗。如有借提驗名色。侵挪入己者。該督撫題叅。照侵盜錢糧例革職治

罪。○三十八年奏准文武官員。經徵正雜等項錢糧。如係奉

旨分年帶徵之案。應將原奏降職降級。仍令戴罪徵收各員。按其原議處分減等議處完結。仍以欽奉

恩旨之日為始。另行起限催徵。如年限內完解不足分數。將經催各官照例分別叅處。○四十年奏准。嗣後衛守備遇應升都司時。如有經徵之案。俱於推升本內。聲明扣除。令其離任。完日開復。○四十八年奏准。各衛應徵津貼餘租銀兩。如

不實力催徵。致有拖欠。即照正項錢糧經徵不足分數之例。分別議處。○四十九年奏准。官員經徵正雜等項。未完錢糧。如奉有

恩旨。分年帶徵。其原叅降職降級停升戴罪徵收之案。按其原議處分。照承緝案犯被鄰境別汛拏獲之例。減等議處完結。仍以欽奉

恩旨之日為始。另行起限催徵。如年限內完解不足分數者。將經徵各官。照例分別叅處。○又奏准。承銷鹽引。未完一分二分三分四分者。均照舊議處。至五分者。降二級調用。六分降三級調用。

七分降四級調用八分以上革職○又奏准衛

所應徵所屬寄莊

此縣民人
被縣地畝

買花戶錢糧於每

年開徵之始即查明開造村莊戶民錢糧數目
清冊移交居住之州縣衛所代行催徵如至奏
銷未完即交代徵之員照正項錢糧未完之例
辦理○又奏准衛所經徵耗羨務與正項隨同
報解若有未完照正項錢糧之例按其未完分
數一律處分○嘉慶六年奏准外任武職員弁
應扣降罰銀每季請領俸餉時該管上司查明
案件飭令領餉之員造冊同文另送藩司覆覈

按數扣除。歸入兵馬奏銷案內造報。降罰案多者。以原議奉文先後挨次扣抵。不必拘定先扣現年之案。如各案一年內不能扣清。准入下年接扣。並於造報冊內聲註。應扣不扣。有心蒙混冒支者。將冒支之員革職。違例支給之員降一級調用。如係查覈未清。以致誤支者。本員降一級留任。違例支給之員。照違令公罪律。罰俸九月。○又奏准。官員養廉建贖銀兩。並不隨時完解。以致遲延。三月以上者。罰俸六月。半年以上。罰俸一年。一年以上。降一級留任。○又奏准。武

職衙門前官有侵欺挪移情弊。接任官徇隱不報。經上司訪聞查出者。將前官及接任官一併嚴叅。如接任官查出前任有侵挪挖欠等弊。不受交代。通詳上司。上司不揭報題叅。徇庇前官。逼勒新任官交代者。新任官即據實報部。除將逼勒上司照徇庇例議處外。督撫提鎮降一級調用。○又奏准。衛所武職疏銷鹽引。能於奏銷前如數全完者。照正項錢糧全完之例議敘。○又奏准。地丁漕糧鹽課等項錢糧。奏銷案內未完各官。叅後續報徵完。經戶部議覆奉

旨。該省督撫接准部文。將該員議處之案。題請開復。若以續完咨部者。在叅案未經題覆之前。戶部即於本案奏銷內扣除。免其議處。或部議已經奉

旨。尚未行文。戶部亦即據咨改繕題本。請

旨開復。如續報全完各官。已另案革職。該督撫毋庸具題止咨報。戶部覈明。轉咨吏兵二部。分別扣除開復。至挖欠在民錢糧革職降級官員。未經離任之先。如能將挖欠錢糧全完者。即行開復。仍留本任。該督撫於題請留任之時。其員缺另

擬有人而未經奉

旨者。將原官留任。如原缺所補之人。已經奉

旨。將新任官令其赴任。原官留省另補。○又奏准。衛

所經徵接徵未完各官。叅後續完。本官已經申

報。該上司勒捐不行轉詳。及遲延不報者。將該

管上司各官罰俸一年。○又奏准。地丁錢糧經

徵未完。衛所守備千總。照隨漕輕齎初叅未完

例議處。○又奏准。經徵錢糧衛所官。申報未完。

該管上司轉報全完者。降二級調用。○又奏准。

衛所守備千總。徵收田房稅羨銀兩。隨收隨解。

如延緩不解。該督撫查叅。將該衛所各官。罰俸一年。○又奏准。衛所官員。承追錢糧。欽奉

特旨。豁免者。現叅原議處分。一併查銷。叅限內奉旨。寬免錢糧分數者。限滿未完。除扣算

赦免分數外。止照現在未完分數處分。至二叅限內奉

奉

旨。分年帶徵錢糧。原叅各官。以欽奉

恩旨之日為始。另行起限催徵。如年限內完解不足。所分之數。仍照未完分數。分別叅處。○又奏准。衛所官員。將已徵錢糧。挪用。誑稱民欠。或如火

耗及私派加徵。或豫徵次年錢糧。俱革職拏問。其豫徵錢糧。即作為次年正項錢糧。○又奏准衛所各官。將錢糧蒙混銷算者。並不查明。率行轉詳之上司。降一級留任。○又奏准。凡河工夫食銀兩。衛所各官於本年經徵全完。數在三百兩以上者。照例議敘。如經徵未完一分二分。罰俸三月。三分四分。罰俸六月。五分六分。罰俸九月。七分八分。罰俸一年。九分十分。降一級調用。不及一分。並署印官不及一月者。免議。○十二年議定。凡烏什阿克蘇錢局所鑄錢文。於正額

之外。如能多鑄一百串以上者。該管官紀錄二次。○又議定。原例載官員將經手各項錢糧乾沒侵欺者。革職提問。仍行追贓。如係兵丁侵欺者。該管官革職。將侵欺之兵丁提審追贓。其該管上司不能先事查出。照八旗例載佐領等官乾沒侵欺。參領都統應得處分。分析增載。如官員乾沒侵欺。該管上司豫先不行查出者。降一級調用。提督總兵罰俸一年。○道光九年奏准江南有漕州縣。每年應征行月錢糧。於十月內先以六分完解道庫。給丁濟運。如不足六分之

數有誤支放者。即行咨參。將經徵之衛所各官。罰俸六月。再限三月完解。如尚不完。罰俸一年。若至奏銷時。仍有挖欠。即作為十分考成議處。其浙江省嘉興湖州二府。催徵白糧項下車夫等款錢糧。亦照此例行。○十二年奏准。出征效力辭休。斥革勒休。千把外委。並年老退伍。及受傷患病殘廢兵丁。請給養贍。均令於離營之日。即行呈報。該管官查明有無子弟在營食糧。分別給予糧餉。若離營日並未呈報。續行補報者。概不得支給。僅有浮冒。或離營呈報時。有勒索

等情。將該管營弁叅處。至陣傷亡故兵丁眷口半餉。如果該管州縣詳查確實。無論何時呈報。均予支食。即以呈請之日起支。以杜浮冒。○三十年議准。武職接收交代。查明前任各有虧挪。輒聽情出結。瞻徇私受者。出結官革職。分別追賠。該管上司失察不揭報者。降一級留任。

承追。○康熙四十二年議准。武職各官有追賠虧空贓罰及分賠等項銀兩。一千兩以下者。於文到日限一年追完。不完罰俸一年。再限一年。不完降一級留任。再限一年。追完開復。不完照

所降之級調用。若承追一千兩至五千兩者。以五年為期。每案每年追完二分。不及二分者。初叅降俸二級。二叅罰俸一年。三叅降一級。四叅再降一級。皆留任。五年限滿。追完開復。不完照所降之級調用。承追五千兩以上者。以十分為率。勒限五年。初叅降俸二級。二叅罰俸一年。三叅降一級。四叅再降一級。皆留任。五年限滿。完至七分者。開復。未完之銀。再行按年起限。不及七分。照所降之級調用。至接任官以任事之日起。扣限承追。如本人實屬無力完帑。承追官出

結呈報。由督撫題請豁免。不得株連親族。僅濫行著落親族代賠。將承追官革職。若豁免後本人現有產業。悉行入官。出結官革職。該管上司照文職例分別議處。所欠之銀著落出結官賠補。該管上司有逼勒出結之事。不行出首者。將出結官並逼勒之上司皆革職。○又議准武職各官有承追之銀。於一年限內追完三百兩以上之案者。每案紀錄一次。一千兩以上之案。五年限內追完者。紀錄一次。接任官以任事之日起限。於一年限內追完一千兩以上之案者。加

一級五千兩以上之案者加二級一萬兩以上之案者加三級此等加級遇別案承追應降調者即予抵銷若一年限內追完一萬五千兩以上之案者以應升之缺即用○乾隆十六年

諭嗣後凡虧空案件到部應詳加察覈其有實在侵貪入己之劣員仍令該上司等分賠不得稍為寬貸其如挪移款項與倉穀浥變等事止將該員議罪著追不必概令上司分攤賠補致滋擾累○二十四年奏准凡追賠虧空贓罰及分賠等項一千兩至五千兩者以四年為期每年每案追完二分五

釐完不及數者。照例議處。至四年限滿全完開復。不完。照所降之級調用。五千兩以上者。仍照舊例議處。至工程覈減報銷腳價。及一切欠項。數在三百兩以下者。限六月追完。不完。照雜項錢糧例議處。○又奏准。承追官於一年限內追完一千兩以上。四年限內追完五千兩以上。及五年限內十分通完。各紀錄一次。○四十九年奏准。官員徵追未完銀兩。後經分賠代賠。無徵追之責者。原議之案。悉照案犯被鄰境拏獲之例。按其畧限應得處分。減等議處完結。○嘉慶

七年奏准。凡承追侵盜贓罰銀兩。數在三百兩以下者。於文到日限六月通完。不完承追官降俸二級。再限六月。不完罰俸一年。另行起限承追。至承追因公覈減及分賠代賠等項銀兩。數在三百兩以下者。六月限滿不完。降俸一級。再限六月。不完罰俸六月。另行起限。承追三百兩以上至一千兩者。一年限滿不完。罰俸六月。再限一年。不完罰俸一年。再限一年。不完降一級留任。一千兩至五千兩者。以四年為期。每年每案追完二分五釐。完不及數者。初叅降俸一級。

二叅罰俸六月。三叅罰俸一年。四叅降一級留任。五千兩以上者。勒限五年。每年每案追完十分之二。完不及數者。照承追一千兩至五千兩例議處。五年限滿完至七分者。開復。如完不及七分者。照所降之級調用。○又奏准。官員應繳銀兩。尚未完清。復奉文有應繳之案。如俱係尋常案件。力難並繳者。於前案清完後。再將後案定限完繳。其後案之承追督催各官。亦於定限之日起限。若係奉

旨嚴追之案。不得援照此例。○又奏准。凡同案分賠

公項人員內有家產盡絕無力完補者。將其人名下應賠之數豁除。不得復於同案各員。並通省養廉內攤扣。更不得於承追省分著落賠補。違者照違。

制律議處。○又奏准。回籍人員應追各項銀兩。該員一面按限完繳。如有部減不符。及任所派賠不公等情。於本旗本籍呈明。移咨任所覈辦。毋許擅求自赴任所清釐。儻該管官有混為聲請者。照贍徇例降二級調用。如案內情節。必須親自質對。方能完結。將緣由咨部。移咨各旗籍飭令。

前往俟完竣之後即行勒回本籍。若有藉端擾累情事。該督撫據實嚴叅治罪。○又奏准挖欠官項。本人力不能完。若分居析產之兄弟族屬。不知情之親友奴僕。若未侵漁公帑寄頓私財者。承追官有巧借認幫名色。勒令賠補。或藉稱嚴查寄頓刑求嚇詐者。俱革職。儻受累之人告發。上司不為准理。照徇庇例降三級調用。○同治元年

諭。前因多隆阿奏叅記名提督趙既發擅自離營。並將勇丁口糧私行帶去一千餘兩。當經降旨革職。永不

敘用。茲據給事中王憲成奏。請將該革員私帶勇糧照數追還。並治以應得之罪等語。軍營餉需。關係緊要。近來各路帶兵將弁。往往浮冒剋扣。中飽私囊。甚至任意取攜。毫無顧忌。致令行間士卒。不免飢寒。積弊日深。殊堪痛恨。此項勇丁口糧。自係軍營正款。若令該革員擅自攜去。竟置不問。轉使違令藐法之員。得遂其侵蝕營私之計。殊不足以肅紀律而重軍需。即著多隆阿將該革員趙既發。私行帶去勇糧。勒令如數繳出。仍計贓科罪。按律懲辦。以肅戎行。嗣後各路軍營。如有似此侵吞餉銀藉端肥己者。除將所侵

銀兩照數著追外。並著各該大臣督撫等於查明後。即行嚴叅究辦。從重治罪。以儆效尤。